

Mánudaginn 30. mars 1998.

Nr. 140/1998.

Lögreglustjórinn í Reykjavík

(Egill Stephensen saksóknari)

gegn

Sigurði Erni Ágústssyni

(Helgi Jóhannesson hrl.)

Kærumál. Gæsluvarðhald, a-liður 1. mgr. 103. gr. laga nr. 19/1991.

Dómur Hæstaréttar.

Mál þetta dæma hæstaréttardómararnir Markús Sigurbjörnsson, Arnljótur Björnsson og Gunnlaugur Claessen.

Aðilar skutu báðir málinu til Hæstaréttar með kærum 25. mars 1998, sem bárust réttinum ásamt kærumálgögnum 26. sama mánaðar. Kærður er úrskurður Héraðsdóms Reykjavíkur 25. mars 1998, þar sem varnaraðila var gert að sæta áfram gæsluvarðhaldi allt til þriðjudagsins 7. apríl nk. kl. 16.00. Kæruheimild er í 1. mgr. 142. gr. laga nr. 19/1991 um meðferð opinberra mála. Sóknaraðili krefst þess, að varnaraðila verði gert að sæta gæsluvarðhaldi allt til þriðjudagsins 19. maí 1998 kl. 16.00.

Varnaraðili krefst þess, að úrskurður héraðsdóms verði felldur úr gildi. Þá krefst hann einnig kærumálskostnaðar.

Með vísan til forsendna hins kærða úrskurðar verður hann staðfestur.

Kærumálskostnaður dæmist ekki.

D ó m s o r ð:

Hinn kærði úrskurður er staðfestur.

Úrskurður Héraðsdóms Reykjavíkur 25. mars 1998.

Ár 1998, miðvikudaginn 25. mars, er á dómþingi Héraðsdóms Reykjavíkur, sem háð er í Dómhúsinu við Lækjartorg af Júlíusi B. Georgssyni dómarafulltrúa, kveðinn upp úrskurður þessi.

Lögreglustjórinn í Reykjavík hefur með vísan til a-liðar 1. mgr. og 2. mgr. 103. gr. laga nr. 19/1991 um meðferð opinberra mála krafist þess, að Sigurði Erni Ágústssyni, kt. 150470-5019, Reykjavíkurvegi 44, Reykjavík, verði gert að sæta áfram gæsluvarðhaldi frá lokum gæsluvarðhalds, er rann út kl. 16 í gær, uns dómur gengur í máli hans, þó eigi lengur en til þriðjudagsins 19. maí nk. kl. 16.

Ávana- og fíkniefnadeild lögreglunnar í Reykjavík vinnur nú að rannsókn ætlaðra stórfelldra brota kærða og Davíðs Garðarssonar, kt. 190869-5399, gegn ávana- og fíkniefnalöggjöf. Í þágu rannsóknarinnar hefur kærði sætt gæsluvarðhaldi frá 10. mars sl.

Rannsóknin snýst um innflutning á 1.008,4 grömmum af amfetamíni, er fundust í bifreið af gerðinni BMW, sem kærði flutti inn frá Hamborg og kom til landsins 4. þ. m. Í stað amfetamínsins kom lögregla fyrir í bifreiðinni pakka af gerviefni. Kærði neitar staðfastlega aðild að innflutningi þessum.

Kærði kveðst hafa farið til Hamborgar í febrúar sl. til að kaupa bifreið og sammælt við framangreindan Davíð að hittast þar. Kveður kærði Davíð hafa aðstoðað sig við bifreiðakaupin og að koma bifreiðinni á réttan stað á hafnarsvæði borgarinnar. Þá hefur kærði látið hafa eftir sér, að hann þvertaki ekki fyrir, að Davíð hafi komið eða látið koma pakknum fyrir í bifreiðinni. Kærði hefur viðurkennt að hafa eftir fyrirætlum manns eða manna, sem hann getur ekki lýst, tekið pakkann, sem lögregla hafði komið fyrir í BMW-bifreiðinni og hann taldi hafa að geyma fíkniefni, úr þeirri bifreið, komið honum fyrir í annarri bifreið í eigu sinni og skilið hann þar eftir, til að maðurinn eða mennirnir gætu vitjað hans. Hefur kærði borið, að hann hafi haft grunsemdir um, að ekki væri allt með felldu, en vegna hótana mannsins eða mannanna hafi hann ekki þorað annað en fara að fyrirætlum hans eða þeirra.

Skýringar kærða á aðdraganda og ástæðu þess, að hann flutti umræddan pakka milli bifreiða í eigu sinni, eru um margt ótrúverðugar.

Ætla verður, að með innflutningi svo mikils magns amfetamíns sem um ræðir í máli þessu, hafi fremjandi eða fremjendur orðið uppvísir að því að hafa brotið gegn 173. gr. a almennra hegningarlaga. Rökstuddur grunur er um aðild kærða að innflutningi þessum, og eftir því sem rannsókninni hefur undið fram, hefur sá grunur styrkst fremur en veikst. Á hinn bóginn þykja rannsóknargögn málsins ekki bera með sér með nægjanlega gagngerum hætti, að fram sé kominn sterkur grunur í skilningi 2. mgr. 103. gr. laga nr. 19/1991 um aðild kærða að innflutningnum. Að svo vöxnu máli er því ekki unnt að fallast á, að tilvitnuð lagagrein eigi við um kærða. Verður því að hafna gæsluvarðhaldi á grundvelli greinarinnar.

Enda þótt rannsókn málsins sé vel á veg komin, er þó ljóst, að hún er enn á viðkvæmu stigi. Þannig eru skýringar kærða á aðdraganda og ástæðu þess, að hann flutti umræddan pakka milli framangreindra bifreiða, um margt ótrúverðugar. Einnig hefur verið leitt í ljós, að fjárhagsleg tengsl eru milli kærða og Davíðs Garðarssonar. Þegar litið er til þess, sem að framan grein-

ir, og að hér er um umfangsmikið og mjög alvarlegt sakarefni að ræða, þyk-
ir með vísan til a-liðar 1. mgr. laga nr. 19/1991 verða að fallast á fram komna
kröfu. Verður kærða samkvæmt því gert að sæta áfram gæsluvarðhaldi, þó
þannig, að það vari eigi lengur en til þriðjudags 7. apríl nk. kl. 16.

Ú r s k u r ð a r o r ð:

Kærði, Sigurður Örn Ágústsson, sæti áfram gæsluvarðhaldi, þó eigi
lengur en til þriðjudags 7. apríl nk. kl. 16.
